

**Hasan Ali Melakukan Amalan Tidak Sepatutnya Dalam Pemberian Kontrak - MB  
Bernama  
27 Mac, 2012**

SHAH ALAM, 27 Mac (Bernama) -- Menteri Besar Selangor Tan Sri Abdul Khalid Ibrahim Selasa mendakwa wujud amalan yang tidak sepatutnya dilakukan oleh bekas anggota Exco Negeri Datuk Dr Hasan Ali dalam pemberian kontrak membabitkan projek prasarana di negeri ini.

Katanya, amalan itu dilihat berlaku apabila Hasan dikatakan mencadang serta menentukan syarikat-syarikat kontraktor untuk diberikan tender bagi melaksanakan kerja-kerja tersebut.

"Saya menerima laporan audit menunjukkan Hasan campur tangan dalam hal itu (pemilihan kontraktor), cuba cadang dan tentukan siapa (syarikat) yang dapat.

"Saya akan adakan temuduga kontraktor-kontraktor yang terlibat untuk mengetahui bagaimana mereka dapat kontrak tersebut," katanya ketika menggulung perbahasan usul menjunjung kasih titah ucapan Sultan Selangor, Sultan Sharafuddin Idris Shah pada sidang Dewan Undangan Negeri (DUN).

Dalam pada itu, Menteri Besar berkata kos pengubahsuaian pejabat Hasan semasa menjadi exco negeri yang dikatakan berjumlah ratusan ribu ringgit adalah mengikut tatacara kewangan ditetapkan.

--BERNAMA

Hakcipta © 2012 BERNAMA

Source: <http://www.bernama.com/bernama/v6/bm/newsindex.php?id=655234>